

O LE SULU SAMOA



EKALESIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA

IUNI 2020

email: sulusamoa@cccs.org.ws -Main Office: Ph. 24414, Ext 30 - website: www.cccs.org.ws

OSIGA FEAGAIGA EFKS VAOVAI, FALEALILI



Timoteo Momoemausu FT, Solonaima, Vaigafa Paleono FS, Tunumoso S. Iosia FT, Iosefa A. Uilelea FT, Hon. Fiamē Naomi

OSIGA FEAGAIGA EFKS

AUALA, ITU O TANE



MOTUSAGA & TANYA LESA



VAIGafa & SOLONAIMA
PALEONO AI'I

FAASINO UPU

1. O LE LAUGA	2-3
2. OSI FEAGAIGA EFKS VAOVAI	4
3. OSI FEAGAIGA EFKS AUALA	4
4. NA O AFIGA E TULEI MAI	5-7
5. O LE ALE MALIU O IESU?	8-9
6. O AUAFIOGA O LE SULU	10-11
7. MO TUPULAGA	12
8. O E UAFAI I LAGI FOLAUGA	12-16

O LE LAUGA

F. Tuai: Kenese 1:1 - 5; F. Fou: Ioane 1: 1 - 5
Matua: *“Na faia e le Atua le lagi ma le lalolagi i le amataga.” (Kene.1).*

Manatu Autu Vaiaso (Tusi Faitau Aso):
FUAFUAGA MAMAO 20:20 (20:20 VISION).

O le fuaitau Fuafuaga Mamao 20:20 (20:20 Vision) ua faasino i le agavaa o se tasi na te mafai ona silafia manino ai, e tusa ma le ma'ati o lana vaai o soo se mea i le mamao e 20 futu - o le fua ma le mamao talafeagai tonu lea mo soo se tagata. Ua faavae ma faaigoa ai polokalame lauiloa a le televise ABC e faalauiloa atina'e tuutuu mamao, i tagata ma soo se vaega o le soifuaga. E lasi ma mata felefele su'esu'ega ma mafaufauga o faia'oga, a'oa'o ma auga tamā o le Ekalesia, faasino i le foafoaga ae maise i le Kenese 1: 1 -5. Ua mautū ma mausali lelei le faatuatuaga Kerisiano i le tele o itu, e ui ina o loo fa'aauau pea sailililiga ma finauga i nisi itu. O le a le afea le lavelave lea, ae fia faamamafa le autu pei ona ta'ua, le foafoaga ua manino ai le silasila mamao ma le fuafuaga loloto a le Atua; o le galuega e le'i fuafuaina mo na o ni tausaga, ni senituri poo ni meleiniuma, ae auga tupulagā ma e faavavau mo le manuia ma le saogalemu o le lagi ma le lalolagi. E mativa foi le gagana ma le mafaufau o le tagata, *“E lē mafai ona su'esu'eina lona silisilise.” (Sala. 145).* Ae tau o ni nai motuga-afa tatou te faasoa ai ma faatatau mai i mea ua tutupu i nei aso.

(i) O le itu muamua e fia ta'ua, o le tapenaga a le Atua poo le faavae. Mata o le tasi lea uiga o le fuaitau, *‘na fegaoioia’i foi le Agaga o le Atua i le fogatai’*. E lē tapula'a le silafia a le Atua na te manaomia ai se tapenapenaga ae le'i faatinoa le foafoaga. Leai. Ae

o loo fetalai mai o la mo i tatou o tagata galulue ma fia fausia mea lelei - afai e fia maua ni mea e moni, mautū ma anagatā, ia lava le taimi e tapena lelei ma sauniuni mamao ai. Ia matuā faa-fegaoioia'i le Agaga o le Atua i totonu o loto ma mafaufau, i fonotaga ma faatofalaiga, o tapuaiga ma talosaga, o sailiga ma su'esu'ega; ia sua le aulapauta ma le aulapatai, tu'utu'u mamao ma faaloloto le utaga. 'Aua foi le faia ma loto pouliuli, nunumi ma gaogao, a o loto e lelei, malamalama ma mamā e i'u manuia ai. Aisea fesuiaga i pulega o Matagaluega o Falema'i, ma Falepuipui i Samoa? Ae a suiga o le faavae? Ua iloa nei i aafiaga o le Faama'i Oti Covid-19 le tele o vaega o le soifuaga e le'i oo i ai se faatatau pe a tula'i mai faalavelave ogaoga, ma aafia ai le gasologa masani i aiga, faiga malo e oo i Ekalesia. Mo le EFKS ua lē tauaofia lana Fono Tele o lenei tausaga 2020; ua lē faataunuuina ai nisi o faamoemoega tetele e masani ai. Ae ua faigata foi ona fai fetuuna'iga mo nisi fuafuaga poo nisi auala, ina ne'i feteenai ma lona faavae, ona e le o fatagaina mai se malosi faapitoa i le Taitaifono, le Laulau, poo se Komiti e faia se fuafuaga. Ma o se fafagu lelei lea ua faia e lenei faama'i, a o lata mai le iloiloga o Faavae ma Iugafono Tumau a le Ekalesia. E toe tula'i mai pefea e sili atu le ogaoga a taeao ua lava tapena i ai.

(ii) Ua liliu e le Atua le soona nunumi ma gaogao e avea ma lalolagi maopoopo, ua lelei ma ua malamalama. O se tasi molimau i aafiaga o le Covid-19 - ua fai ai nisi suiga lelei i le soifuaga masani o tagata. Fai ma faataitaiga o fefaatauaiga faapisinisi i le Aso Sa i Samoa. Sa avea lenei faiga o se mea lelei ma tatau i Aso Sa ua alu. O lenei ua tapu faaletulafono e le Malo nei faiga i Aso Sa, ma o se suiga ua sili ona lelei ua tusa ma le finagalo moni o le Atua na faia le ulua'i aso. Ua avea foi tapu o le faama'i ma ala ua fai ai Osiga Feagaiga i Aso Sa, ma ua molimauina ai le sili atu ona mamalu ma paia nei sauniga lotu, ina ua tuu le faamamafa i le itu faaleagaga. Pe mata e lē o se isi lea suiga mai le mea lelei i le mea e sili ona lelei ma matagofie? Ina ua faaititia pe taofia ai nisi mea faaletino (o loo faatonu mai e Iugafono Tumau). A o se faamāmā avega foi lea e pei ona finagalo ai le Alii, *‘o la'u avega foi e māmā ia.’* O le fuata ma lona lou. E tumau faavae ae sui faiga, e pei o upu a le atunuu. Ia manatua foi le uluai aso lea ua avea nei ma tatou Sapati, o le suiga aupito sili ona lelei lea mo tatou.

(iii) E i ai le pouliuli e pei foi ona i ai le malamalama. O lea le natura o le lalolagi - o le mea e i ai le lelei e filo ai foi le leaga. E faumālō le pouliuli o ia e matua, finau mai i lona tulaga sa muamua ona i ai o ia, faatasi ma le gaogao ma le nunumi, ae le'i faia le malamalama. O se finauga sesē ma faapaupau lenei, auā e lē o le pouliuli na muamua ona i ai, ae o le Atua, o le malamalama foi lea, e muamua i mea uma. Ua maitauina ma le faanoanoa i le tele o malo o le lalolagi, le malolosi o tu ma aga faa-pouliuli - o faiga pi'opi'o amiolētonu, o le pule sauā so'ona fai o tagata ma le fa'aaogā sesē o tofi ma tulaga faata'ita'i (pei o Amerika ma Brazil). Ua pisia ai foi ma lo tatou tofi pele o Samoa, i le faateteleina o faiga pi'opi'o faasolitulafono ma lē Kerisiano. O le faaupuga - *see something, say something, do something* - e faasino i le tiute o soo se tagatanuu ia mataala e lipoti faiga faaterorisi e lamatia ai malo. E faasino foi i le au Kerisiano ua suluia i le malamalama o Keriso, e vaai i se mea ua sesē ma leaga, ona tautala lea e faailoa ma fai i ai se galuega e faasa'o ai. Auā o le gūgū, moe'i'ini ma faataligatuli i ai, ua tusa lava lea ma le auai ai i le faiga o lea amioleaga. E ui ina lamatia ai i puapuagā, ae o lo tatou valaauina lea mai lava i le amataga - o le malamalama o le lalolagi i tatou.

(iv) Sa le'i aveeseina atoatoa e le Atua le pouliuli; na ona Ia tu'u eseese ia iloga ai mai le malamalama, ma fa'aaogā ai le pouliuli e avea o se auauna i taimi e tatau ai. E fai ma tofotofoga i le tagata ia saga faamalosi ma pupula pea lona malamalama. O mea faatupu tiga ma mafatiaga i tagata, o faafatiatama'i foliga eseese o le soifuaga. Ua i ai nei le lalolagi i se tasi o aso sili ona pogisa i lona tala faasolopito. Ua leai se tafa o le kelope e lē aafia ma afaina. O le pouliuli o loo momoli mai ai nisi o faamanatu lelei mo ta'ita'i o malo ma tagatanuu, tainane foi le Ekalesia, ina ia toe liuliu toe matimati le tofa ma le uta, ia matata'u i Le na faia i tatou uma. Peita'i e le tutusa le malosi o le pouliuli e pei o le paoa ma le mana o le malamalama, o lea foi e manumalo ai le tagata pe a ufitia i le pogisa. *'Ua pupula mai foi le malamalama...ae le'i manumalo ai le pouliuli.'* O le Upu faalototele e mafanafana ai mai le fefe ma atuatuva'e, faanoanoaga i aafiaga o faama'i. E pupula manumalo Le na faia le lalolagi ma mea o tumu ai.

(v). O fuafuaga mamao a le Atua na fai toatasi, aunoa ma le tagata, na te le'i manaomia se fesoasoani. Sau le taimi fuafuaina fai le tagata, ma valaauina e faatagata le lalolagi, fau le nuu ma lona malo e ala i le tagata o Aperamo ma tuufaasolo ai le gafa seia fanau mai le tagata o Iesu. O le molimau a Ioane o Iesu lea le Atua na silasila ma fetalai, o lana afioga na malele atu, o le Upu lea na fai ai le lagi ma le lalolagi. O le Atua ua liutino tagata. O le tele o fuafuaga a le Atua ua valaauina ai le tagata mo le faatinoga. O se valaau tatou te lagona ai le faamaulalo ma faafetai i lona fa'aaogaina o tatou tagata faatauvaa. Ae tele foi nisi fuafuaga a le Atua na te fa'aaoga ai isi vaega o le foafoaga, aunoa ma le tagata. *"⁹¹O lau pule o loo tumau ai ia mea i le aso nei; auā o au auauna ia mea uma lava."* (Sala. 119). Pei o le susulu o le la, le timu le matagi, laueleele ma peau o le vasa, i lo latou lagi lelei faapea aso o lo latou loulouā. Ua aogā le faama'i COVID-19 i o tatou tupulaga, e fai ma auauna e a'oa'oina ma toe fafagu ai i mea ua lapelapea ai. Na te fa'aaogā mea na Ia faia. Ae ua oo ina toe fai le foafoaga fou mo le tagata, na o le Atua lava e toatasi na faia, aunoa se tagata, aunoa se natura poo nisi vaega o le lalolagi,

(vi) Na silasila mamao le Atua e i ai le taimi e pa'u ai lana palealii, ua faamoemoe i ai le vaaiga o le foafoaga; o le a mafuli lana amio i le faa-pouliuli, ma i'u ai ina toe faasaga atu le uluulu o le laau ia te Ia. Peitai e le'i alo tamala o Ia i lea tulaga pe a oo mai - o le pupula o Lona alofa o le faamoemoe lea na te toe faalelei faafou ma faatumauiina le lelei o le foafoaga nei, ma se isi foafoaga pe a talafeagai ai.

I le gagana Eperu, o le ulua'i Upu o le Tusi Paia o le Bereshit - e fausia mai mataitusi Eperu Tav, Yud, Shin, Alef, Resh, Beit. I le su'esu'ega a se tasi faia'oga o le gagana Eperu, a faamatala le a'a ma uiga o mataitusi taitasi, ona faitauina lea faa Samoa: *'O le Alo o le Atua, ua faapaleina i le pale tuitui i lona ulu, i luga o le laau, o le meaalofa o le feagaiga.'* E mamao mamao lava fuafuaga a le Atua. Ia ia te Ia le viiga ma le faaneetaga e faavavau. Amene.

(FSulu, e sui ai le Lauga na atofa mo Iuni 2020)

OSI FEAGAIGA EFKS VAOVAI

Na faatumulia le malumalu o le EFKS Vaovai (Pulega Falealili, Matagaluega Falealili Safata Siumu) i le sauniga o le Osiga Feagaiga ma lo latou Faifeau susuga Vaigafa Paleono Ai'i ma le faletua o Solonaima i le Aso Sa 21 Iuni 2020. Na ta'ita'i le Toeaina o le Pulega, susuga Tunumoso Soliola Iosia FT (Taitaifono Fono Tele). Na auai foi le afioga Sui Taitaifono Fono Tele/Failautusi KAT, susuga Iosefa Uilelea FT & Faletua, o matua faaleagaga o le susuga Vaigafa, o le afioga Hon. Fiamē Naomi faapea le mamalu mauuluga i aiganalua mai Lotofaga ma Lano Faasaleleaga (le afioaga o le Faletua ia Solonaima). O le Tusi Paia na faitauina e Letone Uili FS (FT: Esoto 17: 8 - 13; FF: Mataio 8:23-34), o Tatalo na saunia e Momo'e Gagaeolo FS, a o le Lauga na saunia e Amosa Vaetoe FS le Failautusi o le Pulega. Na fai ma matua le Mataio 8:25-26, o le Tusi Faitau Aso - Faatuatua ma le Fefe.

Sa fai ma sui o le EFKS Vaovai le afioga Misaoi Konelio TK e molimau i la latou filifiliga, na taitai e le susuga Toeaina ma le Failautusi o le Pulega i le Aso Sa 7 Iuni, o le palota na fulisia i le susuga Vaigafa. Na tali fuaitau foi le Faifeau i le lagona faafetai i le Atua, e ala i le faatofalaiga a le Ekalesia. E 10 tausaga talu ona i'u mai Malua ma galulue i Kolisi a le Ekalesia, ma lagolago ai le susuga Toeaina ia Uilelea ma le Faletua o Teki i le EFKS Lotofaga. Na fai ma sui o le Ekalesia Aoao e faafeiloa'i aloaia le Faifeau ma le Faletua, afioga Taitaifono & Sui Taitaifono Fono Tele ma la'ua Faletua, faapea le susuga ia Timoteo Momoemausu FT & Faletua (Pulega Aleipata, LLA). Na fai ma sui o le Matagaluega FSS le Failautusi Matagaluega susuga Feata Perelini FS, Amosa Vaetoe FS ma sui o le Pulega Falealili, ma Misaoi Konelio TK ma sui o le EFKS Vaovai. O le afioga Hon. Fiamē Naomi na fai ma sui o Aiganalua, a o le faletua ia Sina Anoa'i Faletutulu na fai ma sui o Tina, ma ia tau'a'ao atu ai ma le Api o le Galuega. Na tauuluga lea sauniga i le Sakarameta o le Faamanatuga na ta'ita'i e le Faafeagaiga Taulagi auā le afio o Tapaau Susuga TuiSamoa, afifio Le Usoalii, le mamalu ia Lufilufi ma le Toavalu o Taulauniu. Na folasia foi ma silatoga le ta'ita'i o le sauniga ma le potopotoga i le o le Feagaiga na saunia e le Ekalesia ma Aiganalua, ma taape fiasia ai le sauniga ina ua mae'a tau'a'aoga o faa'aloaloga ma taulaga na latou osia i lea Sapati. Ia viia Le ana le galuega.

OSI FEAGAIGA EFKS AUALA

O le Aso Faraile 12 Iuni 2020 na osi ai le feagaiga a le EFKS Auala ma lo latou faifeau, susuga Motusaga Lesa ma le faletua ia Tanya. O le susuga Motusaga o se lupe faalele mai le afioaga o Saanapu, a o le faletua ia Tanya o se taulaga soifua a aiga mai le afioaga o Neiafu. O le susuga i le Toeaina o le Pulega Itu Asau, susuga Amuia Seuala FT na taitai le sauniga ma le osiga feagaiga. O le Tusi Paia na faitauina e le susuga Peia Lesatele FS (Avata); talosaga na taitai e le susuga Leauma Faletoe FS, (Falealupo uta). O le lauga na nafa ma le susuga Namaia Kofe FS (Vaotupua), sa faavae i le manatu autu o lea lava aso - Afi o le Feiloaiga (Galuega 28:1-10). Sa faaopoopo foi apoapoiga a le Taitai o le Sauniga i le Faifeau ina ia tuu lana faamamafa i le Tusi Paia/Lauga ma tapenaga o taumafa faaleagaga e fafaga ai le lafu mamoe, a o le Aulotu foi i la latou pito laau. Na saunoa le afioga i le Tiakono matua ia Matanea Saulo e fai ma sui o le Aulotu e tusa o la latou filifiliga ua tofia ai nei la latou faafeagaiga. Na saunoa foi le susuga Motusaga e faafetaia le Atua e tusa o le fa'aaogaina o i la'ua, faafetai i le Ekalesia ona ua afe ane la latou faatofalaiga e fa'aaoga ai lo la'ua ola mo le Atua. Na fai ma sui o le Ekalesia Aoao, le Matagaluega & Pulega e faafeiloai ma faamautu leni feagaiga, le Ta'ita'i o le Sauniga ma Toeaina uma o le Matagaluega -Susuga Tanielu Apineru FT (Pulega Gagaifomauga), Palemia T. Reupena FT (Pulega Gagaemauga), Seuamuli Fasi Toma TT, o sui e toalua o le EFKS Auala, faapea le aufaigaluega mau tofi o le sauniga. Na valaauina foi e fai ma sui o Aiga na lua, susuga Toeaina ia Enefatu Lesa FT (Pulega Vaimauga Sisifo, Mtg Apia Sasa'e) ma le Tiakono Toeaina o Falealili Safata Siumu, afioga Tafafuna'i Simeavao TT (na auai faatasi ma Danny Epati FS, Iakina Alefaio FS ma Ionatana Te'o FS). O Faletua o le Au Toeaina ia Tiresa A. Seuala ma Seataata T. Apineru na fai ma sui o le Mafutaga Tina. Ona tauuluga lea i le sauniga o le Talisuaga Paia a le Alii na ta'ita'iina e le susuga Motusaga. Sa taape fiasia lea aso ina ua mae'a silatoga i le o le Feagaiga, na saunia e aiganalua ma le EFKS Auala, auā le susū o le Gafa le afio Alaimalo i latou e Toalima ma le mamalu ia Safune, ae maise o le taumafataga ma fa'aaloaloga mauululuga na latou saunia, o taulaga faafetai i le Atua, seanoa o Ia e le tau lau o leni faamoemoe. Ia ia te Ia le viiga e faavavau.

NA O AFIGA E TULEI MAI FOFOGA

UA ALU ATU LE AFI

Na faai'u mafaufauga mai le Tusi Faitau Aso o le masina o Me i le Afi o le Penetekoso, *"³Ua iloa foi e i latou o laulaufaiva peiseai o le afi ua vaevaeina, ua nofo i o latou luga taitoatasi."* (Galu.2) O le afi paia na fa'aaupagaina ai le au aposetolo mo le misiona, le afi susulu e faamalamalama ai le ala latou te uia i le faasusuluina atu o le Tala Lelei i nuu e tele, le afi maamaa e susunu ai tu ma aga faapaupau, le afi aasa e faamamā ai agasala a tagata e salamō, le afi mamana e papatiso ai i latou e talia Iesu Keriso ma le faatuatuaga Kerisiano, ma isi uiga ma aogā o le afi i le misiona. E ui ina o le laulaufaiva o le tagata e fa'aaogā, ae o le afi o le Agaga e faamanaina ma nanea ai upu, tala ma le si'ufofoga o le tagata.

O se faatomuaga lelei lea mo le ulufale mai i le masina o Iuni, e saga mafaufau ai i nisi vaega o le soifuaga o loo atagia ai le mu saesae o le faavaivai ma le fefe, le afi o le amiolētonu ma faiga pi'opi'o e fia tineia, ma nisi amioga pei ni lālā vine ua lē fua ua tataua ona *"⁶faapopoina, ona faapotopotoina ai lea e tagata, ma lafo i le afi, ua susunuina ai."* (Ioa.15). E oo mai nei o loo mu talalī pea le afi lē matineia o le Faama'i oti o le Covid-19 i le tele o malo ma atunuu o le lalolagi: Peretania, Europa, Amerika, Asia ma le Pasefika. O le afi o loo tuufesili ai le toatele i lona faamatalaina, pe i ai sona uiga loloto ma se uiga faalelotu - pe se mala/faasalaga/taui o agasala a le lalolagi, pe se faailoilo/fa'aaliga/faailoga o mea a tutupu, pe ona pau lava o le faama'i ua tupu i le faatamala, vaivai ma le sogasogā o le tagata, ma matilatila ai lona ausage ma le tapula'a e le'i saunia mo faalavelave ogaoga faapea. E i ai nisi tagata ua taumafai e faatautavā ma faatoilalo le Atua e ala i le fa'aaogaina o tekonolosi ma su'esu'ega faasainenisi ae ua gaosia ai na o au'upega mata'utia e faaumatia ai le fanau a tagata, nai lo le faaleleia o le ola ma le manuia o le lalolagi. O le fausia o vailaau oona, atomika, niukilia, ma isi ituaiga kasa faaliu auupega,

latou te faaumatia ma soloi ese tagata mai le fogaeleele. Mata o se tasi lea mafuaaga o le Covid-19 – o le faamasinoga ua faia lava e le tagata i lona natura agasala ina ia toe faaumatia ai o ia lava. I le isi itu, o le fela'ua'iga e auala faasalalau o tala, lipoti, faamatalaga, mafaufauga, mau, talitonuga ma faauigaga eseese e faasino i lenei lava faama'i, e mafai ona faatusa i le 'Olo o Papelu' *"⁹O le mea lea ua igoa ai ia o Papelu; auā na faaeseeseina i lea mea e le Alii o gagana a le lalolagi uma; na faataapeape foi e le Alii ia te i latou ai lea mea i le lalolagi uma."* (Kenese 11). O ai na iloa pe o le Covid-19 o se auala e taofi ai le tagata mai le mea mata'utia o ia faia nei? O le auala ua faamanatu mai ai e le Atua ua na o Ia e toatasi e 'silafia mea uma, e i ai i mea uma, e mafaia mea uma'? Aua ua gūgū ma fememea'i saienisi, o le au popoto, ta'ita'i faapolokiki o malo e oo i le au fai valoaga faaperofeta ua lē iloa se upu a fai - ua leai se isi e mafai ona vavalo pe silafia se aso e uma ai le faama'i. Ua leai foi se isi e silafia se vailaau e togafiti ai, na o le fememea'i a o loo faaopoopo pea le numera ua aafia (pesia - 11,304,534; maliliu - 531,659 (6/7/20 @8.39am). Peiseai o loo fetalai mai o Ia i le lalolagi, 'Ua alu atu le afi'.

PE A TUGIA OE I LE AFI

"¹O lea lava aso ua tupu ai le sauā tele i le ekalesia i Ierusalem; na faasalalauina foi i latou uma..." (Galu.8).

E le'i finagalo Iesu e nonofo umi ona soo i Ierusalem ma aumau fifilemu ai, ae tau lava o sina taimi puupuu. Na Ia fetalai atu ia i latou, *"⁴⁷ina ia tala'iina foi le salamō ma le faamagaloina o agasala i nuu uma i lona igoa, e amata mai i Ierusalem."* (Luka 24). O le finagalo o Iesu, o Ierusalem ua na o se nofoaga e faau'u ai i latou, e faaofu i le mana ma le malosi o le Agaga Paia mo le galuega tala'i, ae o loo faatali mai le lalolagi tele e fia oo i ai le talaiga – e ao ai ona vave o ese mai Ierusalem. Peitai fai mai Luka *"⁵²Ua latou toe foi mai i Ierusalem ma le*

PE A TUGIA OE I LE AFI NA O AFI OGA O LE AFI MAFANA

olioli tele; ⁵³sa i le malumalu i latou e lē aunoa, o latou o vivii atu i le Atua.” (Luka 24). E leai se afaina o le faatali i le Atua mo Lana faasinoga, ma le mana e faatino ai le feau ua faatonu mai mo oe; ae telē le faalētonu pe afai o le a saga nofonofa ai pea i le mea e tasi ma toe fai faafia ni feau ua uma ona fai muamua. Sa fetalai mai Iesu, “⁸O le a maua e outou le mana, pe a afio ifo le Agaga Paia i luga ia te outou; e fai foi outou ma molimau ia te au i Ierusalema, ma Iutaia uma lava, ma Samaria, e oo lava i le tuluiga o le lalolagi.” (Galu.1).

E faapefea ona aveese e le Atua i latou mai lo latou sone mafanafana sa i ai? Ina ua Ia tutu le afi e mu ai i latou! Ina ua latou fetaia’i ma sauaga puapuaga. *“¹Ua tupu ai le sauā tele i le ekalesia i Ierusalema...na faasalalauina foi i latou uma i nuu...⁴Ua o solo foi e na faasalalauina, ma latou folafola atu le tala lelei o le upu.” (Galu.8).* Ua tatou talitonu e ao ona folafola ma faasalalau atu le Tala Lelei i soo se itu o le lalolagi, pe afai lena e muamua ona faa-tala leleiiina lo tatou lava lotoifale. Peita’i e toaititi i tatou e maua avanoa e tuua ai o tatou aiga ae o atu e momoli. Tatou te nofo tatalo, tatou te loto foi e totogi le tau, ae ia tatou nonofo pea ma fifilemu i o tatou sone mafanafana.

Peitai afai e i ai se misiona faapitoa e finagalo ai le Atua mo i tatou, na te faia soo se auala ina ia faataunuu ai lea faamoemoe. Na te faatupu sauaga, puapuaga, faalavelave, ma soo se ituaiga afi e tugia ia mu ai o tatou loto ma o tatou tino, ma tatou o atu ai pei o le uluai au aposetolo. E lē mafai ona tatou taofia faamanuiaga a le Atua e fia faaoo atu i isi; o le mea lea afai e tugia e le Atua le afi e faamū ai i tatou, o loo fetalai mai o Ia, ‘Ua oo mai le taimi tou te tula’i ai e o atu e fai nuu uma lava ma soo.’ Pe faapea mai foi o Ia, ‘Sui se isi nofoaga ese mai lou lotoifale, ma ia fai nisi mea fou o le galuega tala’i, e suia ai mea tuai ua saga fai faafia, ae maise pe afai e lē o toe talafeagai ma le tulaga o ola ai tagata.’ Pe afai e tugia i tatou i le afi ma tatou gaioi ai, o le faailoga lea o lo tatou talia o le galuega a le Agaga Paia.

“⁶⁷Ua iloa e ia o Peteru o loo mumulu, ua na vaai atu foi ia te ia, ua faapea atu, ‘O oe foi sa oulua faatasi ma Iesu le Nasareta’ (Mare.14).

“²⁹E ui lava ina tausuai o tagata uma, ou te lē faapea lava a’u.” O se saunoaga lototoa lea mai ia Peteru na tautino ai lona mulimuli ma le faamaoni ia Iesu. Na ia taumafai e faataunuu lana folafolaga lenei i se ituaiga auala foliga matavale, e ala i lona alu i le lotoā a le ositaulaga sili, peitai na ia faafitia lava na te lē iloa Iesu. O lana gaioiga pala’ai lea na i’u ai ina ia saili se faamafanafanaga mo ia i tafatafa o le afi. Pe sa i ai sona faamoemoe o le mafanafana mai le afi o le a mafai ona te’a ese ai le maalili vaoa o lona agaleaga? Pe o le a avea le afi e ta’ita’ieseina ai manatu mai lona i ai i le mafutaga sa’o? Mata sa ia faamoemoe o le afi o le a faamamā ai ona mafaufauga ua faatumulia i le agasala. Atonu e foliga faigofie atu le saili o le mafanafana nai lo le faafetaia’i o faafitauli e lagona ai lo tatou lē manofonofa lelei, ae maise lava pe afai e lagona ai o tatou ua agaleaga.

O le tanumia o le ulu i lalo o le oneone faapei o se kasita (e lafi ai pe a fefe i se faalavelave), o le filifiliga lea a Peteru na fai - ia faanunumi faalēiloga atu ma isi i autafa o le afi, ma le faamoemoe o le a lilo ai lona tulaga o ia le soo o le pagotā. Ae o lona saili fesoasoani i le mafanafana mai o le afi, na mate’ia ai lana tupua. O le afi e fuifuilua lona faia o suiga ma lona fa’aailoa mai o mea natia, pe a fua i le tali a Peteru ina ua fetaia’i ma puapuagā. O agasala o le faafiti ma le masalosalo ua sui tulaga i lona faatuatua mausalī, ua fememea’i ma lē taofia ai ona loimata maligi - se mea e va i maila le mamao ma lana amio masani o le soo e lē fefe. Tasi o le mea o le mafanafana o le afi, e ui ina o se nofoaga o le faafiti a’ia’i, na avea foi o se nofoaga mo le faatinoga o le toe faafoisia atoatoa. *“⁹Ua latou tūta, ona iloa lea o le afi malala..” (Ioa.21).* O tafatafa o le afi malala pei o le afi i le lotoā a le ositaulaga sili, na toe faafouina ai le mafutaga a Iesu ma Peteru, faapea le ofoina atu ma le taliaina mai o le faamagaloga. *(faaliliu mai le Tusi Faitau Aso, 10 Iuni 2020)*

O TUA'OI LELEI NA O AFIGA E TULEI MAI FOFOGA

O le faia o Tuaoi ta'i 2 mita i le va ma isi tagata, o se tasi lea aiaiga o tulafono mo le puipuga o le pepesi o le Faama'i oti Covid-19 i le tele o atunuu o le lalolagi. E tãua lea mo le saogalemũ ma le maloloina o tagata uma i la le tino. E faapea foi ona tãua le fai o tuaoi e puipua ai lou saogalemu ma lo tatou maloloina i le itu faaleagaga – i le va fesoota'i, va fealofa'i, va tapuia ma soo se ituaiga va. E eseese ituaiga Tuaoi, e pei ona eseese le mamao ma le latalata o le va tatou te manaomia e nonofo ma ola ai ma isi tagata. E mafai e Tuaoi ona ta'u mai le ituaiga soifuaga o tatou ola ai; latou te faailoa le mamao ese poo le latalata, o le alofa poo le inoino o tatou ola fesootai ai ma o tatou tuaoi o isi tagata, o lo tatou va lava foi lea ma le Atua, “²⁰*auā o lē lē alofa i lona uso ua ia vaai atu i ai, e lē mafai ona alofa o ia i le Atua ua ia lē vaai atu i ai.*” (1 Ioa. 4). A faatau se fanua poo se fale, e manaomia laina tuaoi e manino lelei, e iloa ai mea e fai mo tatou ma mea e faasaina. A lelei tuaoi o fanua, e lelei foi tuaoi o tagata. *Faata. 25*, “¹⁷*Ia seāseā ona e alu atu i le fale o lē lua te tuaoi; nei musu o ia ia te oe, ma 'ino'ino ia te oe.*” O le a le latalata o le tuaoi lelei?

(i) *O Tuaoi Malō/Fufusi (rigid boundaries)*. O tuaoi nei ua fuafuaina e faamamao ese ai isi tagata, ina ia puipua ai o tatou lotoifale – e fausia pa, loka faitoto'a, tuu ai ma ta'ifau, faapipii ma lapata'iga: 'Ua Sa'. Aisea? Mafua mai le fefe! Fefe mai le osofa'i e isi, ne'i pulea ma faatiga e isi, fefe mai le lē atoatoa, ausage ma gaogao pe a faatusatusa ma isi. Ona tula'i mai lea o le nofo toatasi, nofo ese ua leai se mafuta leai se fesoota'iga ma isi. Tatou te naunau i se olaga mafuta ma fesootai, ae ua tatou manana'o e tapu ma fa'asā ona o le fefe. Tatou te faapea ifo, E te lē taufaamata'u mai pe a vavamamao lo ta'ua tuaoi. Peitai e leai, e lē faapea. O le finagalo o le Atua ia tatou ola mafuta faatasi ma isi, ia ola va nonofo Latalata, ia faasoa ma fetufaa'i i manuia faapea to'atugā o le olaga, ae lē o le ola tutoatasi pe nofo toatasi. 1 Kori. 1, “²⁵*Ina nei i ai i le tino se maseiga, a ia fetausia'i faatasi uma itu tino.*” ²⁶*Pe*

afai e tiga le tasi itu tino, ia tiga faatasi ai itu tino uma lava; pe a viia le tasi itu tino, ia olioli ai itu tino uma lava.” O tuaoi faamalō ma fufusi latou te fāoa se olaga e tamaoaiga i fetufaaiga ma mafutaga mafana ma isi. O lona uiga e ao ina aapa atu! Na faia i tatou ina ia tatou avatu mo isi, ma talia foi ma le faafetai mea e aumaia e isi. O le faataatiaga o nuu ma aiga i Samoa faapea le matala o ona maota ma laoa, e afua ai le soifuaga fetufaa' ai o aiga i le alofa – mai lava i saili tauaga ma masima, e oo i sii alofa ma fesoasoani i taimi o faalavelave ogaoga pei o maliu ma saofa'i. Pe a tatou avatu, ua faamalieina i tatou; pe a tatou taliaina, ua faaatoatoaina i tatou. O le a se isi mea e sili atu? *O tuaoi fufusi ma faamalō (rigid boundaries)* e mafua ai ona tatou teena ma faasā isi tagata mai o tatou olaga, ma tatou ola ai e lē saunia ma lē faaauega lelei mo se soifuaga vavalalata ma se va-fesootai faa-auma'i-avatū e maloloina lelei.

(ii) *O tuaoi tuu-saunoa (permeable boundaries)* e tatala atu le avanoa mo isi tagata latou te solia mai ai ou lotoifale; e te tuu ai oe i se tulaga lē malu puipua lelei mai tagata latou te soona faaaogāina oe ma le lē tatau - i latou e pau lava le mea o manatu i ai o le faamalie o latou mana'o ma la latou pule, ae leai ma se manatu i lou afaina poo le aafia o isi tagata. O le i'uga - o lou malepelepe ma masofasofa i le soona fa'aaoga sesē e isi tagata, poo lou soona aiā fua i mataupu ma'ale'ale o isi tagata. Ona pei ai lea o oe, “²⁸*O le aai ua sofa'ia, ua leai se pa*” (*Faata. 25*). Ia silafia e i ai le tapulaa/tuaoi o mea uma; e o'o i le usita'i, o le alofa ma le faamagalo – ia 'aia le auai i fuafuaga ma faatonuga e feteenai ma le finagalo o le Atua. “³²*Ai sē fai upu i le Atalii o le tagata, e faamagaloina lea; a o lē fai upu i le Agaga Paia, e lē faamagaloina lea i le olaga nei po o lē atali.*” (*Mata. 12*).

(iii). Peitai o tuaoi fetu'utu'una'i lelei (*flexible boundaries*), e faia e tagata ua faamalieina i le ola tauivi ma atina'e i latou lava, ae paleni lelei foi ma lefiafia e faasoa pe fesoasoani atu i isi pe a manaomia.

O TUA'OI LELEI

E agalelei ma faasoa atu o latou taimi ma avanoa, o latou punaoa ma faamanuiaga, aunoa ma le soona tuulafoa'i pe soona faaalu vale i se tulaga e lafoa'i ai o latou lava tiute faapitoa mai le Atua, ua avea ai i latou ma tagata tulaga ese mai isi. O tagata ua ola i tuaoi fetuutuuna'i lelei e lē tā mau i se tulaga e tasi, ae fua i luma toe fua i tua, e fua i le taumatau faapea le agavale, o luga ma lalo ifo, e sua le aulapauta ma le aulapatai, e fetuutuuna'i muniao, e fua i le tulaga ua tula'i mai i lea taimi ma lea taimi; latou te lē seetia gofie i lagona o isi, e lē faamasino pe faitio i isi, e lē faalagolago foi a latou faaiuga i vaivaiga ma manaoga masani o le lalolagi, ae fai mea faalogo i le musumusuga a le Agaga o le Atua. Pe a oo mai aso faigata, e lē vevesi vale ae tumau le to'amalie, e taula'i pea le faautaga i le Atua le punavai o mafauauga lelei, ma maua ai le loto tele e fai faai'uga talafeagai tusa pe itagia ma inosia ai e tagata o la latou lava amio o le faitio ma faasalaese. O Paulo le tagata sa ola i le ituaiga tuaoi fetuutuunai lelei - *"¹²Ua ou iloa le mativa, ua ou iloa foi le mauoa, o i mea uma lava ou te i ai, ma mea uma ua oo ia te au ua aoaoina ai au ia ou maona, ma ou fia ai, ia faulai mai mea, ma ia oge mea. ¹³Ou te mafaia mea uma lava ona o ia ua faamalosi mai ia te au."* (Fili. 4). O tagata faapea ua latou ola i le mau, *"²Ia outou fesui i a outou avega e ave."* Kala.6, aunoa ma le soona aiā pe soona solia measina, meatotino ma mealilo a o latou tuaoi.

TAULAGA PE FAAFETAI?

Le ulugalii tafafao i Korea, tau atu o sua mai le fanua Toso e le atalii le palau mamafa, o le tamā e tulei tua 'Talofa e, ai lava se matitiva', misialofa lea a le to'alua I le misionare faaliliu-upu ma taitai malaga ia te i la'ua

'Ioe, o le aiga lea o Kai Nevi.' Le Misi ua tali fuaitau O le latou povi sa tosoa le palau ua latou ave e faatau Maua mai le tupe, na ave uma tuu i le lima o le faifeau Lagolago le galuega ale Ekalesia, le malumalu fia fau

Umi se taimi e leai se tala, le ulugalii ua faate'ia agaga Ona fai atu lea o le fafine, 'E maoa'e lea osiga taulaga' Tali Misi, 'E lē ta'ua o se taulaga, i la latou tu ma aga Ua latou maua se povi e faatau-na o le Faafetai lava'

O LE Ā LE MALIU O IESU?

Pe aiseā na finagalo ai le Tamā ia maliu Lona Alo e toatasi, ma faatino i se auala e sili ona matagā ma tigā? Auā *"⁶ua faao'o ia te ia e le Alii le amio leaga a i tatou uma."* (Isa. 53). O le maliu o Iesu e sui tulaga (vicarious) – ua fai e Ia le galuega mo tatou; o le maliu foi e faaola (atoning) – ua faamautūina ai le aveeseina o agasala mo i tatou ma toe faaleleia ai i tatou ma le Atua. O le maliu e faa-ositaulaga (sacrificial), e faataunuu ai le faiga faavae o le faaolataga (principle of atonement) o loo a'oa'oina ma fesootai ma osiga taulaga i le Feagaiga Tuai: *"¹¹Auā o i le toto le ola o le tino; ua ou tuuina atu ai foi ia te outou e fai a'i le togiola mo outou i luga o le fata faitaulaga; auā o le toto o le mea lava lea e fai a'i le togiola mo le tagata."* (Levi. 17). *"²²A lē o i ai foi se faamaligiina o le toto, ua leai foi se faamagaloina."* (Epe. 9).

O Ia le 'Atamu mulimuli', o le tagata lona lua i le tala faasolopito o le lalolagi e fai se gaioiga ma sui o le fanau a tagata, na maliu ai o Ia faa-faimasui (representative). O le maliu o le tagata ua afaina fua faa-ositaulaga (sacrificial victim), ua na aveese a tatou agasala e ala i lona uia o le faasalaga oti (death penalty) na fai mo tatou, na maliu ai Iesu faa-sui tulaga mo tatou (substitute). O le aveeseina o le toasā o le Atua mai ia i tatou ona o agasala, ua avea ai le maliu o Iesu o se gaioiga e faamalieina ai le finagalo paia o le Atua (propitiation) *"²⁵ina ia faaalitinoina mai lana amiotonu i le lē tauia o agasala ua mavae, i le faapalepale o le Atua."* (Roma 3). *"²O le togiola foi o ia mo a tatou agasala, e le gata foi i a tatou, a e atoa foi ma agasala a le lalolagi uma lava."* (1 Ioa. 2). O le avea o Ia ma ositaulaga sili, toe avea ma taulaga osi, ua na faia ai le taulaga e silisili e le toe faaluaina, ua fiasia i ai le Tama *"ina ia faia o ia ma ositaulaga sili e alofa ma faamaoni i mea a le Atua, ina ia faia e ia se togiola mo agasala a le nuu."* (Epe. 2). O le maliu ua fai ma auala e toe fa'aatoatoa ai (expiation) lo tatou malepelepe ona o agasala. O le lavea'iina o tatou mai le faapologaina i agasala, ma le faasalaina o Ia e

tauia ai lo tatou amio leaga (retribution), ua avea ai le maliu o Iesu e faa-faitoaga (redemptive) ¹³Na faatauina mai i tatou e Keriso ai le faafanoga o le tulafono, ina ua faafanoia o ia mo i tatou.” (Kala.3). ⁷O Ia foi ua tatou maua ai le togiola i lona toto, o le faamagaloina o agasala, e tusa ma le faulai o lona alofa tunoa.” (Efe.1). ¹⁸Auā ua outou iloa e le’i togiolaina outou i mea e pala...¹⁹a o le toto tāua o Keriso e pei o lo le tamai mamoe e lē ponā, e leai foi sona ila.” (1 Pete.1). O lona fai ma soo-upu e fai le leleiga i lo tatou va ma le Atua, ua avea ai lona maliu o se toe faaleleiga (reconciliation) ¹⁰Auā afai ua lelei i tatou ma le Atua i le maliu o lona Alo, ina o fai i tatou mona fili, e matuā faaolaina lava i tatou i lona soifua, o i tatou ua lelei ma ia. ¹¹A e le gata i lea, a ua tatou mitamita foi i le Atua, ona o lo tatou Alii o Iesu Keriso, o ia ua tatou maua mai ai nei le leleiga.” (Ro.5)

O lea lava maliu na tatala ai le faitoto’a mo lo tatou ta’uamiotonuina (justification)—faamagalo (pardon) ma taliaina (acceptance), ma lo tatou avea ma tama fai (adoption) - o le fai ma sulī, o atalii ma afafine o le Atua ¹O lenei ua ta’uamiotonuina i tatou i le faatuatua, o lea ua tatou lelei ai ma le Atua, ona o lo tatou Alii o Iesu Keriso.” ⁹O lenei, ua tauamiotonuina nei i tatou i lona toto, e lē faaolaina ea i tatou e ia i le toasā i se ā?” (Roma 5). ⁴A ua oo atu i le faaatoaga o tausaga, ona auina mai lea e le Atua o lona Alo, na fanau i le fafine, na fanau ua nofo i le tulafono; ⁵ina ia faatau mai e ia i e na nofo i le tulafono, ia avea i tatou ma atalii.⁷O lea, ua lē toe fai oe ma pologa, a o le atalii; a e afai o le atalii, o le sulī foi, ona o le Atua.” (Kala.4) O lenei sootaga fiafia ma lo tatou Mataisau, e faavae ma faamaufaaailoga i le faaolataga i le toto, o le Feagaiga Fou lea o loo fetalai ai Iesu i le Afeafe Tele Aupitoaluga. ²⁸O lo’u toto lenei, o le toto o le feagaiga ua faamaligiina mo tagata e toatele e faamagalo a’i agasala.” (Mata.26). O le maliu ua tatou tufi tau fao ai faamanuiaga uma o le alofa tunoa o le Atua. Ia ia te la le viiga e faavavau.

LAUGA E FAATINO

Ulu atu si tama ua amata le lotu, tau su’e sona nofoa
Le aulotu ua fegenoa’i, leai se isi na avane se avanoa
O ona ofu o lana toniga a’oga mo le 4 tausaga atoa
Ua avea ma Kerisiano, na ala ai ona ulufale nei loa

Savali pea le tama i luma, sei oo i lalo ifo o le pulelaa
Saofa’i lelei taula’i le vaai ma faalogo i le ositaulaga
Le aulotu feita le tama ua inosia le tapuaiga se ulaga?
Uma le pese, tula’i le faifeau sauni e fai lana tautalaga

Faatali teisi, ua tu mai le toeaina matua o le Ekalesia
Ua 80 tausaga, e aloaia, tulaga lelei toe fa’aaloaloga
La’ala’a malie i le pulelaa, le aulotu faatali ma le fiafia
Le tootoo o le a sasa le tama, lana amio o le a aoaia

Taunuu le toeaina, vaai ifo i le tama, tu’u ese le tootoo
Umi se taimi o tau faapaleni vae ma lona tino ia nofo
Le potopotoga lea ua segia mea faate’ia ma ua ofo
E ese le mea na manatu a fai, ese lea ua tuia ai o loto

O le vaaiga ese le toeaina ma le tama tapua’i faatasi
I lalo o le fola, o se mea e le talia i tu ma aga masani
“E galo le lauga o le a fai,” fai atu ai le feagaiga taulagi
“A o le lauga ua faatino, o le a le galo i soo se tasi”

Tautuana ma oe, pe faapefea ona e faatino lou olaga
‘Aua e te faamasino atu, ‘aua e te vaai male faatauva
Nei misia lou avanoa ua aumai e te faia ai le faaolataga
Fai oe ma lauga, poo se Tusi Paia e faitau ai isi tagata.

“⁴¹Ua pa’i atu ia te ia.”(Mare.1)

Valaau le faatautu’i e saili se tasi e faatauina le vaiolini
Le laau ma’osi’osia ma pefua, e lē mana’o ai se isi
‘Amata i le \$1, ua i ai le \$2; e i ai se \$3?’ le toe fesili
‘Ua taulia nei...’ Ae te’i ua taofi atu e se tamā tino-iti

Savali atu le faa-ulu sina, tago ile laau tafi ese le pefua
Faasa’o ona manoa, le laautososua tuu a’e i le ua
Ta le pese, ua mālīe nauā, pei o agelu ua latou usua
Toe sui le leo o le faatau-tu’i: \$1,000 ua si’i ai le fua

\$2,000, \$3,000, ma taulia loa le vaiolini ma le fiafia
Tuu fesili nisi, pe aisea na si’i maualuga ai lona alumia?
E mafua i lima o le master, na pa’i atu ma faaola o ia
E faapea le tagata ma’osi’osia le ola ua lē toe taulia
Pe a papa’i i ai Aao Paia, na te siitia ma toe faafoisia

O AU AFIOGA O LE SULU I O'U VAE

PE AFAI UA TA'ETA'EI

O le faalavelave mata'utia e ta'ua o le Lolo Molo i Posotono (The Great Boston Molasses Flood 15/1/1919), na mu ai le taavale tane 15 mita le umi x 73 mita lapotopoto, ma lana uta o le molo o le suka e 8.7 miliona lita. E 21 tagata na malelemo ma maliliu, 150 na manunu'a; o manu papalagi, maota ma laoa ma taavale e tele na malelemo uma i le molo. O le moliaga - na silafia e le kamupani o loo faaletonu le taavale tane, sa i ai vaega ua ta'eta'ei, ma latou faia i ai galuega faalelei – na o le valivali o ta'eta'ei i le lanu o le molo, ma faate'a ese ai mai le mafaufau. Na silafia ua ta'eta'ei ae lē faia i ai se galuega lelei. O le i'uga - o le faalavelave mata'utia ma le oti.

E a'oa'o mai lea faalavelave mo i tatou: (i) Ia mataāla i ta'eta'ei o le olaga; o mea e lē amana'ia nei, e malemo ai taeao. (ii) 'Aua le valivalia ta'eta'ei tau ina ufiufi ia lilo i le vaai a tagata, ae ia matua fofola i luma o le Atua o tatou masaesae ma ta'eta'ei o Ia e mafai ona toe faafouina atoatoa. (iii) O le ā le ta'eta'ei o tatou olaga o i ai nei, ae afai tatou te foi i le Atua, na te toe faafoisia o tatou olaga. ³*O le ū gāpēpē na te lē gausia.*”(Isa.42). O le gagana faa-perofeta lea e faailoa ai le agamalū ma le agalelei o le Atua, faapei se tagata a o Ia punou ifo e toe faalelei ma faafou i tatou ua malelemo i le agasala.

Atonu e te manatu ifo o au agasala ua maoa'e tele, e lē mafaamagaloina. A e leai. Ua fetalai le Atua, ⁶*O le Alii, o le Atua alofa mutimutivale ma le alofa fua, e telegese lona toasā, a e tele le alofa ma le faamaoni.*”(Esoto 34). ⁴*Ou te faamaloloina lo latou liliu ese; ou te alofa fua ia te i latou; auā ua liliueseina lo'u ita ia te i latou.*”(Hosea 14) ¹⁸*Na te lē faamoemoe pea i lona toasa, auā e fiafia o ia i le alofa.* ¹⁹*E toe alofa mai o ia ia te i tatou, e faatoilaloina e ia a tatou amiolētonu; e te lafo foi a latou agasala uma i mea loloto o le sami.*”(Mika 7). O Ia le Atua faaola o tagata ta'eta'ei ma malelemo i le agasala.

TAUSISI I LE FAAMAONI

⁶*Faauta, ua e finagalo i le faamaoni o le loto.*”(Sala.51).

Fai mai le Tusi Paia, ⁹*ua leai foi se pepelo i lona fofoga.*”(Isa.53). Pe ana pule faamalosi le Atua ia i tatou, poo faapea foi ona leai se pepelo i o tatou loto. E lē saili le Atua ina ia faaitiitia lo tatou ola pepelo, ae ia matuā aveesea atoatoa. E tuu sa'o lava Lona finagalo faasino i le lē faamaoni. ⁷*E lē nofo i lo'u fale o sē fai mea faa'ole'ole; o lē tala pepelo foi e lē tumau ia i o'u luma.*”(Sala.101) O loo faailoa mai e Paulo le lisi o ituaiga tagata e lē sao i le Malo o le Lagi – ⁹*o e faitaaga, ma e ifo i tupua, ma e mulilulua, ma e tauātane, ma e faasotoma,* ¹⁰*ma e gaoi, ma e matape'ape'a, ma e onā, ma e agatele(fai upu leaga ma upu pepelo i isi), ma e fao mea)* (1 Kori.6) E te faapea ane – e tutusa lo'u fai tala fatu/tala faatupu e tiga ai isi, ma le faitaaga, mulilua ma le fasioti tagata? Ioe, e tutusa i le Atua le lē faamaoni i nai mea iti (e pei o le tuai i le galuega pe vave manava i le 5 minute) ma lou tootuli ma ifo i luma o tupua. ²²*E inosia e le Alii o laugutu pepelo; a o e fai mea faamaoni, e fiafia i ai o ia.*”(Faata.12). Aiseā ua faapea ai le inainā o le Atua i le lē faamaoni? Auā e matuā feteena'i ma Lona uiga Atua ¹⁸*o mea e lua e lē mafai ona liua, e lē mafai ona pepelo ai le Atua.*”(Epe.6). E lē ona o le a lē pepelo le Atua, pe faapea ua filifili o Ia e lē pepelo, ae ona e lē mafai ona pepelo o Ia. E lē mafai e se taifau ona lele, e lē mafai foi e se manulele ona ōu – e faapea foi ona lē mafai e le Atua ona pepelo. Pe a osi e Ia se feagaiga, na te tausisi i ai. Pe a Ia faia se saunoaga, e moni lea. Pe a Ia folafola le upu moni, tatou te talitonuina. ¹³*Afai e lē faamaoni i tatou, e faamaoni pea lava ia – auā e lē mafaia e ia ona faafiti ia te ia.*”(2Timo2). Mo le Atua, o le mataupu i le faamaoni e lē o se mea tau mate pe faanenefu, a e manino lava le uliuli ma le pa'epa'e. Afai e mamafa ia te oe le savavali faatasi ma le Atua ma faafiafia ia te Ia, ia e matuā faasaga e fai le 'faamaoni na o le faamaoni atoatoa aunoa se isi.'

E TOE TUTUPU LAUULU

E mafuli le manatua o Samasoni i ona vaivaiga ma ona toilalo talu ai Talila lana manamea Filisitia. Na leiloa le tele o ona faamanuiaga: lona lauulu, malosī, lana vaaiga i ona mata, o lona mamalu ma le logologoā. O le toa ta'uta'ua o Isaraelu lea ua saisai e Filisitia ma tuu i le ana: ua tauaso, faalumaina, olo saito pei se povi – ua fai ma mataaga e taliē i ai tagata. Peita'i e leai se mea e uma se'i vaganā ua fetalai le Atua e faauma. O taimi na pa'ū maulalo ai Samasoni na ia tagi atu i le Atua mo se lavea'i ma na ia maua mai ai, *“²²A ua amata ona toe tupu o le lauulu i lona ulu.” (Faama.16)*. O lona lauulu le pogai o lona malosī, ua toe faafou ua toe totogo a'e ma toe ola, ma na faia ai le fasi e sili atu ona tele nai lo taua muamua tuufaatasi. Ua ta'ua nei o ia ma faamamaluina faatasi ma isi toa e le Tusitala i le au Eperu, *“³²Kitiona, ma Parako, ma Samasoni, ma Iefata, ma Tavita, ma Samuelu, ma le au perofeta.” (Epe.11)*.

Ua folafola mai e le Atua, *“o e faatalitali i le Alii, e toe faafouina lo latou malosī.” (Isa.40)*. Mata o lona o loo e lagona le tiga i le taimi nei pei o Samasoni; o mea ua tutupu ona o vaivaiga ma mea ua toilalo ai, o tauemuga ma le faatauemu fua mai o tagata, o tuuaiga sese, faasalaga amioletonu ma isi, ae ia e onosa'i ma faapalepale, o loo i le ala le fesoasoani. Sa e tatalo, 'Le Alii e, ua ou vaivai ma toilalo ua lē mafai ona toe tu i luga.' Ua faafofoga le Alii ma ua afio mai e lavea'i ma faasaoloto oe, e faatū i luga ia toe savali ma faafouina lou malosī.

O Iopu foi na matuā mafatia i papala, faamativaina ma aveese ona mamalu, na fasiotia lana fanau ae na ia fai mai, *“¹⁴Ou te faatalitali atu i aso uma o le taua ua tofia ai a'u, seia oo ina suia o a'u.” (Iopu 14)*. Na talia le onosai o Iopu ma toe faafoi e le Atua ona manuia e faaluaina mea na leiloloa. E faapea foi ona Ia faia mo oe, o lea ia onosai, faatali ma le faatuatua. E toe tutupu lauulu; *‘e toe faafouina lou taule'ale'a faapei o le aeto.’* Manatua foi o le Mesia,

IA TU'U ESE ATU

“¹⁰Ia e a'oa'o mai ia te a'u e fai lou finagalo; auā o oe lava lo'u Atua.” (Sal.143)

Pe afai e folafola mai e le Atua se manuia ia te oe ae lē tupu loa i le taimi lena, e faigofie ona e lē onosai, ua amata ona e masalomia le Atua, ma manatu e finagalo o Ia e te alu e fai se galuega ina ia tino mai ai Lana folafolaga. O le mea tonu lena na fai e Aperamo. Na folafola e le Atua o lana fanau *“¹⁷e pei o fetu o le lagi, e pei o le oneone foi i le matafaga;” (Kene.22)* Ina ua fiu Aperamo e faatali, ona ia umia lea o le mataupu i ona lima ma fai le gaioiga e maua ai Isamaeli mai le auauna pologa a lana avā o Sara. Ma o iina na amata ai le tele o faafitauli na ia faatauanaui. O lenei, sa alofa le Atua ia Isamaeli ma na i ai Ana fuafuaga mo ia, peitai o Aperamo e tatau ona ia **tuu ese atu** le tama ina ia taunuu ai folafolaga ma le finagalo o le Atua. O se filifiliga aupito faigata tele mo Aperamo i lona soifuaga atoa. O le mea lea e a'oa'o ina ai tatou:

(i) Ia 'aia le tu'ua le avanoa i le fili e avatu se mea poo se tagata i lou olaga, e faaluafesasi ai manuia ua leva ona e faatali ma tatalo i ai.

(ii) Ia e faaeteete ia i latou e aumai ai fautuaga. O le fai ma 'tamā ia Isamaeli' o se fuafuaga lelei lea e tusa ma le fautuaga a Sara. Ae ua iloa nei e lē o se tuualalo lelei, ae ua afua ai le fevataua'i oo mai nei.

(iii) O lou nofo sauni e talia tuatuagia o mea na e fai, e lē faapea o le a aunoa ai oe ma ni aafiaga mulimuli mai. Ia faaeteete poo fea ae o ai foi e te taoto ai, auā e lē faigofie ona toe tula'i i luga.

(iv) E i ai mea e faigofie ona e **tuu ese atu**, ae i ai foi nisi mea e silisili ona faigatā - e tuu ese atu faatasi ma lou fatu atoa. E sili ona faigata pe afai o se mea ua āu tausagā o e pipii i ai ma atagia ai lou tagata, e pei o se galuega o galue ai, o se nofoaga, maota poo se laoa o aumau ai, o se faiga paaga o fesootai ai. Peitai afai ua mafana le mafutaga ma lau 'Isamaeli' ae ua e sauni e talia manuia folafola mai o le Atua i lou olaga, ua tatau nei loa ona fai lau filifiliga e **tuu ese atu**.

O LE 'ULO TA'E

O le fafine Saina sa i ai ana 'ulo lapopo'a e lua e ave ai ana vai, e tofu le 'ulo ma le pito-amo e tautau ai, pe a alu e asu vai mai le vai'eli. O le tasi 'ulo e ta'e lona itu, ae o le isi 'ulo e atoatoa ma e tumu lelei i vai. O aso uma e taunuu le Saina i le fale ma lana amoga vai mai le vai'eli, o le 'ulo e ta'e le itu, na o le 'afa e tumu ona e masa'a uma le isi afa i le auala. E lua tausaga atoa o fai pea lenei galuega e le Saina, e taunuu i le fale na o le tasi ma le 'afa 'ulo vai. Ma o se mea na mimita ai lava le 'ulo e lelei atoatoa, ae na o le mā o le 'ulo ta'e ma faanoanoa ona ua mautinoa, na o le 'afa na te mafaia pe a faatusatusa a la'ua avega. Ua uma le lua tausaga o tiga le loto, ua manatu le 'ulo ta'e o ia o se auauna toilalo, ona fai lea i le fafine i luga o le vai'eli, 'Ua tumu a'u i le masiasi ma le faanoanoa, ona o le ta'e lea e i lo'u itu; e masa'a uma ai le vai ma e oo i le fale na o le 'afa la'u uta e mafai." Na 'ata'ata le Saina ma fai atu, *'Kasi 'ulo lea 'aualoko vaivai. Maikau oe kogalaau, keke fugalaau magaia, ola kafakafa ikuauuala piko ai oe. Leai faapea ikuauuala le isi 'ulo. Fugalaau ga alu a'u kokō ai, iloa a'u ka'e iku oe. Lua kausaga, kaimi uma savali fale, kafe ifo vai mai ka'e faasūsū kogalaau ola magaia. Lua kausaga fai keu makagofie ai fale keu fugalaau (faauma itulau 13)*

TAUMALATOU I.F.E.
MAUGA TAANO
FESAGAIGA

(21/4/1948 - 23/5/2020)

Na soifua mai Taumalatou ia Aperila 21 1948 i lona aiga i Pagopago Am Samoa. O ona matua, o le afioga i le Maoputasi ia Mauga Ioane Fe'a Sagaiga o Pagopago, ma lona tina o Avele Vaafusuaga o Matu'u ma Faganeanea. Na maliu le tina ia Me 22, 2020 ua 72 tausaga o lona soifua. Na faaipoipo Taumalatou ia Segila Taanoa (maliu) o Levi Saleimoa i le aso 28 o Novema 1981. E toatasi lo laua alo o Barbara Segila Teleso, ma ona alo tautua i le Atua e ala i le Ekalesia.

E malaga mai Taumalatou mai Amerika Samoa, o lotu Katoliko Roma, ae o loo matou lolotu ma ona alo, e le'i faailogaina e le loomatua se lotu. O le mea taua ia te ia, o le faamaoni o le auaunaga i le Alii. Sa ou faamaonia lana mau, i le faatinoga o lana tautua i le lotu. O se tina e fialia e auai i sauniga i Aso Sa taitasi, atoa ai ma lona soifua foa'i mo le Alii ma lana galuega. E tele ona aiga mamao mai isi Setete o Amerika na auai mai i lona aso fialia, e ui lava ina tele tapu ma sa ona o le faamai Covid 19, ae sa molimauina le taupati mamao mai o aiga, ona e alofagia lenei loomatua. I le molimau a fanau ma aiga, o

Taumalatou o se tina osi aiga, toe fai aiga lelei. O ia lava na nafa ma le fatuaiga tausisi, a o soifua ona matua. E lelei lenei tina, e loto alofa lenei tina, e alofa i lana fanau ma ona aiga, e alofa i le Alii lenei tina. Sa ou taitai i lona sauniga faa le aiga, faatasi ma nisi o faifeau a le aiga. Sa tatalo le Susuga ia Tuatagaloa, faitau le Tusi Paia Samoa e le Susuga ia Le'ia, a o le Tusi Paia Peretania na faitau e le Susuga ia John. O lana ulumatua o Sua Tuaau sa fai ma sui o le fanau e molimau i lona soifuaga, ae o a'u na lauga.

O lona toe sauniga i le Aso Lua, na feagai ma le Susuga i le Toeaina ma faifeau o le matou Pulega. Na o le Toeaina ma lona Faletua, ma Faifeau ma o latou Faletua, na fai ma sui o le Pulega, ona sa faa tapula'a le aofa'i o tagata e auai ile fale maliu. Na taitai le Susuga i le Toeaina Elder Andy Leavasa, tatalo le Susuga i le Faifeau Leavasa Tanuvasa o le failautusi o le Matagaluega, faitau Tusi Paia le Susuga ia Loui Seanoa, ae o le lauga o le Susuga ia Pausa Thompson. O a'u sa faia lona molimau faa-le agaga. Faafetai i le Atua mo le soifua aoga o lenei tina, na saafi ma molimau i ai fanau ma aiga, ae maise o le tala i lona soifua galue i le galuega a le Atua. Sa ou taitai i lona sauniga i lona oliolisaga tumau, ma matou faatofa atu ai i le tina pele, i le pese masani a le au Kerisiano. Faafetai i fanau, ona o lo outou fai tina lelei.

O E UA FAI ILAGI LAGILE FOLAUGA

TAUMALATOU IFEMT FESAGAIGA

Manaia le tou faatofa mulimuli i lo tatou tina, i le pese ma le siva na faatinoina i luga o lona tuugamau. Faafetai foi i le paia o aiga, i le faaaloalo sa faatinoina, aua le Susuga i le Toeaina ma le Auaigaluega, faapea le aofia na auai. Ia faamanuia le Atua i le paia o aiga. Talosia ia pa'u se toa, ae tula'i mai se toa. Moe ia oe ma le filemu Taumalatou, manuia lau malaga. *Saunia e le Susuga Time Laufili FS, EFKS Taeao Fou, Long Beach, Ca. Matagaluega AMERIKA.*

OLE 'ULOTA'E

Aga leai ka'e, kasi fale makagā leai keu fugalaau. 'Tamaiti 'aue te mā i ou foliga, 'aue foi e te ita i se vaega o lou tino pei e faaletonu, o lou tino na fai e le Atua. E i ai le uiga ma lona aogā faapitoa na faia ai oe faapena e le Atua. E sili atu lou aulelei ma lou tātua nai lo isi tamaiti, pe afai e te iloa o le Atua na faia oe ia foliga faapena. O le tele foi o nisi tupulaga ua toe ta'ei lava o latou tino ona o lo latou lava lē usita'i-ua ta'ei i fualaau o'ona faasāina, o le 'ava malosi ma ulaula tapa'a a o loo a'oa'oga. Ua ta'ei foliga ona o le fai kegi, faamisa ma faatupu faalavelave. Tusa foi pe e te oo i le fale puipui ma manatu ua ta'ei lou olaga, e mafai ona toe faalelei ma fa'aaogā oe e Iesu i Lana pule ma le alofa pe afai e te salamō toe fuataina ma foi ia te Ia.

LOTOLUA VAIGALU NIUMATA PELE

(5/10/1931 - 29/11/ 2019)

Na faamānavaina galuega a le tinā ia Lotolua i le vaveao o le aso Faraile, 29 Novema 2019, i le Maota Gasegase i Motootua (ua 88 tausaga). Na mafai ona ou oo atu i le falema'i i le vaveao lava lea, ma faia se faamafanafanaga i le pa'ia o le aiga ma nai fanau sa i ai, faatasi ai ma le tatalo, ona matou molimoli lea o le tinā i le maota maliu o Fesili, e faatali ai ona toe sauniga. O le aso Tofi 5 Tesema 2019 na matou malaga ai ma amia le tinā mai le maota o Fesili, ina ua maea se sauniga puupuu, ma faimalaga atu loa i lona aiga i Lepā, ma tofā ai i le po. O le aso na sosoo ai aso Faraile 6 Tesema, na faia ai loa ona toe sauniga. O le susuga i le faifeau o Malo Afi'a FS (Aufaga) na ia faaulufaleina le tinā i le malumalu, o le A'oa'o Fesoasoani o Malielegaoi Pogi na ia faitauina le Tusi Paia, o le faifeau ia Susuga Alesana FS (Vavau) na ia saunia le tatalo, a o a'u na ta'ita'i ma faia le upu faamafanafana. O le tofā ia Malielegaoi Maseiga, se tasi o alo o le tinā, faatasi ma isi o nai tuafafine, sa molimau e fai ma sui o fanau ma aiga. O Lotolua ma te taunuu mai i le nuu, o le tasi lea o tinā matua talosia, ina ua le o toe gafatia le auai mai i sauniga lotu o le Aso Sa ma sauniga faapitoa aua ua matua lava lona soifua ma ua lē toe mafai ai le tele o galuega sa masani ai. Sa faaipoipo atu ia Vaigalu Niumata Pele, ma e to'a

15 si a la fanau, ma le toatele nauā o fanau a fanau. O se tinā e sagisagi e fia talanoa mai pe a alu atu le asiasiga, ona talanoa ai lava lea i le tele o mea o i lona finagalo. E lē malolō lana saunoa mai e ui lava ina ua vaivai lona siufofoga; a lē faamavae atu i ai e lē uma le talanoa fiasia mai o le tinā. Ui e le'i umi ma tele ni aso sa matou masani ma mafuta ai, ae pei lava ua leva ona matou masani i le tele o tala e talanoa ai. O le molimau a tina o le nuu, o Lotolua le tasi toa o le Tala Lelei, auā o ia le tasi tinā sa galue malosi tele ma faamoemoe i ai le Mafutaga a Tinā, le na faalagolago tele i ai le Galuega. O se aiga uluola le aiga o Niumata ma le tinā ia Lotolua, ua manuia foi le fanau ma e toatele isi ua malaga atu i atunuu i fafo ma aumau ai. O le isi lea vaega o lona olioli, e lē gata i le fiasia e talanoa ma fautua mai i le galuega a le Atua, a o lona foi faafetai i le Atua, ua faamanuia le Alii i o la alo ma a latou fanau e toatele. Na faaiu sauniga i lona aiga, ma tuuina ifo lona tino i lona oliolisaga tumau, ma matou faamavae atu loa i ai i le pese a le au kerisiano: Talofa uso e tofaina oe... Ia manuia tele lau malaga tinā. tatou toe feiloai i se aso.

*Saunia e le Susuga
Tavita Maliko FS,
EFKS Lepā
Mtg. LOTOFAGA LEPA
ALEIPATA*



O E UA FAI I LAGI LE FOLAUGA

SEUMANUTAF ASUAO FITIAO VAITOGI TALIFEAU MALAKI IAKOPO(AF)

(19/6/1952 - 4/9/2018)

O Seumanutafa A.F.V.T.M. Iakopo na faamanuiaina i le Tofi A'oa'o Fesoasoani i le faaiuga o le 2008. O ona matua o Rev Iakopo Isaraelu ma Faauliuli Fitiao Alesana Seumanutafa. Sa ulua'i galulue i le Aulotu EFKS i Faatoia ma le faletua ia Pa'u ma le fanau i lo la tofi Tiakono. Na matou amata galulue ma mafuta mai i le 2004, ina ua maluu si ona tuafafine matua sa nofo i le aiga i Letogo.

O Suafa matai mai afioaga o lona tupuaga sa faasuafaina ai o ia. O le faailoga lea, o lona soifua e taunapa pea ma osiosi ona aiga ma mafuta iai. O le vaaiga foi lea o le faatuatuaina o ia i tonu fai ma le faamaopoopoina o lona aiga. Na fai o ia ma failautusi a lenei Alulotu mo le 10 tausaga. O le susuga i le a'oa'o fesoasoani na te u'uina ni faailoga maua luga mai atunu'u mamao i le Vaomatua-Siosiomaga ma Ona Punaoa, o le saenitisi o le Vaomatua i le gagana o aso nei.

Sa avea ma ofisa sili o le Vaomatua, faapea le Ofisa o Faatoaga ma Faiga Faiva mo paeiga sosoo e lua; 2001 – 2007. E tapena mo a matou sauniga lotu e ta'ita'i ai. O ana upu faalaeiau ma faalototele, ina ia una'iina ai pea fanau i a'oga, mo so latou ola manuia. Auā o le manuia foi lena mo aiga, aulotu, nu'u ma le atunu'u. E soifua

to'amalie ma filemu ona uiga. E lafofoga fiafia ma aga malie ana saunoaga. Ina ua maea taimi o lana konekarate i le Matagaluega o Faatoaga ma Faiga Faiva, sa fa'aaogaina ai pea lona tomai, auā galuega fai a le matou nu'u e ala i le Si'osi'omaga ma le Suāvai. O ana fautuaga ma lana tu'uālalo, ia faatumauina pea puipuiga mo le si'osi'omaga auā o le ola lea mo tagata uma, o punaoa mo fa'amanuiga, ae o le tali atu foi lea i suiga matuia o le Tau.

Sa fai foi o ia ma Konesale i le tele o poloketi a le malo, auā e i ai ona agavaa ma le silafia. O le tausaga e 2017, na vaaia ai ona foliga ua gasegase. Peita'i, sa le'i fa'avaivai ai le faletua ia Pa'u, e saili togafiti i Niu Sila mo le tele o masina. E ui lava foi ina ua suia lona tino, ae le tuua ai lava le auai i sauniga lotu. Au Taumafai, Au Leoleo, Sauniga o le Aso Sa i le taeao male afiafi. E auai i Potopotoga, o Filifiliga a le Pulega, Tofiga a le Pulega ma le Matagaluega faapea foi lona usufono ai i le Fono Tele a le Ekalesia 2012. O le aso 4 Setema 2018 na tuumalo ai Seumanutafa Talifeau Malaki Iakopo (AF) i le maota gasegase i Moto'otua. Na molimoli mai lona tino maluu i le aso 14 Setema i le 12.00 aoauli mo ona Toe Sauniga Amata i le Malumalu EFKS Letogo. O a'u sa ou ta'ita'i, a'o Ne'emai Maiava (E.M) sa fofogainga le Tusi Paia, Faamanu Okesene (E.M.I) sa saunia talosaga, Kolio Lesā (F.K) sa saunia le upu faamafanafana. O le itula e 4.00 i le afiafi na fai ai le sauniga faale-aiga. Sa ta'ita'i e faifeau o le aiga. Rev. Uaealesi Isaraelu (Saleapaga) ma Rev

Nuuausala Siasosi (Porotesano – Apia). E to'atele i latou na molimau, o e na latou a'o'oga ma galulue faatasi; taimi o taaloga, o ana uo ma e masani ma ia. O i latou ua sa'afi mo le auauna e aofia ai Papalii Tavita Moala (sa Pule Faleoloa Faatoaga/ Pule SNPF), Rev. Susuga Alesana FS(EFKS Vavau), Rev. Maafala Lima FS (Pule Kolisi Malua), Rev. Napoleone Vaiaso FS (EFKS Salua-uta) Sulutumu Sasa Milo (Peresetene Vai Tumaoti) Anne Leausa (Co-Principal Samoa Primary).

Sa molimau foi sui o le aiga, aemaise o fanau. Sa auga ma faataua, o le tamā e alofa, e onosai ma lotomaulalo, e savali i upu na te a'oa'o. E matagofie galuega na te fai. Na te mafaia ona faamaopoopo ma atia'e, na te amanaiaina fautuaga ma le faasoa mai o tagata. O le mae'a ai o le sauniga faale aiga i le 8.30 i le afiafi, na fai ai loa ma leoleoga, ma tōfā ai i lona maota i Lalotea. O le itula e 10.00 i le taeao, 15 Setema 2018 sa fai ai ona toe sauniga i le malumalu EFKS i Letogo. Sa ta'ita'iina e le Pulega a Vaimauga i Sasa'e. Ta'ita'i: Aila Patea FT, Tusi Paia: Tanoaleia Tunupopo FS, Pita Toleafoa (FS) sa saunia Talosaga, Lauga: Sepi Gafa FS, sa ou molimauina i le soifua galue o Seumanutafa Asua Fitiao Vaitogi Talifeau Malaki Iakopo. Sa auai le Ao Mamalu o le Malo ma le Masiofo, Afioaga i le Tauaana – Tuimalealiifano Sualauvi

SEUMANUTAF A. F. **V. T. M. IAKOPO(AF)**

Vaaletoa II, o feoi o le Talalelei, paia o le malo, aufaipisinisi, uo ma e masani ma si o matou nu'u o Letogo. Sa saunoa le faletua o Pa'u Iakopo i uiga alofa o le tamā ua faia ai lana galuega. E tulimatai ni sini taua ma ni faamoemoega o i ai lelei ma faamanuiaga. O lona loto maulalo ma le faaaloalo i tagata, e faaalua atu ai ona uiga tausafia; e mafai ai ona talanoa, fetufaai ma talanoa fiafia ma mafuta. O ona tomai ma agava'a sa ia te ia, oni meaalofo mai le Atua, na faailoa i le soifua o le tamā. E tusa'afia, onosai e alofa i lana fanau, ona uso ma tuafafine, ma a latou fanau, e agai iai ma faamaopoopo. E loto fesoasoani i so'o se tagata.

Sa avea le ofisa sili o Faatoaga ma Faiga Faiva Afioga Tilafou Hunter e faafetaia le soifua tautua o Seumanutafa Talifeau Malaki Iakopo i le malo. O lona tuafafine o Elisapeta Savaiinaea Fruean na molimau mo uso ma tuafafine. E taumafai lava Seumanutafa e auai i so'o se fuafuaga e fai, e lotoaiga, alofa, soifua faaaloalo. Sa ou molimau i le autu o le Vaiaso-**"Lulu'uga ma Seleselega."** O le auauna e galue, e ao foi na ia selesele lona tautigā. E le mafai ona maua se seleselega pe a leai se lulu'uga. E ao i le auauna ona mataala, to'aga, tapena, ola saunia. O le fai o le galuega ma faamaoni e fai Ia taulamua i taimi

uma ma fai le faata'ita'iga, e le faalogologotiga pe solomuli pe a tele le auaunaga mana'omia. Na te le faatigā i se finagalo o se isi tagata, ae taulamua i le faatupu o le filemu ma le nofolelei. E tusa faifeau male faletua ia Pau Iakopo. E faamoemoeina i tonu fai ma fa'atinoga. E fai taulaga ma taulamua i faata'ita'iga lelei. Amuia lea auauna, pe a sau lona Alii e maua o ia o loo faapea ona fai. O lo'o lagomau o ia i Lalotea i Letogo i lona maota. Ona matou faamavae atu lea ia Seumanutafa Asua Fitiao Vaitogi Talifeau Malaki Iakopo i le Pese a le Au Kerisiano. – Talofa uso e, tōfaina oe. Ia manuia lau malaga, faamaise ma faalototele pea le Agaga o le Atua i le faletua ia Pa'u Iakopo ma le fanau ma aiga uma.

Susuga Lavilavi Soloi FS,

Saunia: Lavilavi Soloi (FS)
EFKS Letogo, APIA SASA'E

ILIGANO A **NAIANA** **KAISALA**

(22/4/1934 -10/4/2020)

O le Afioga ia Iliganoa Naiana Kaisala o se tasi o Tina matua o le ekalesia EFKS Vailele ma o ia foi sa avea ma faufautua lelei i totonu o le mafutaga tina a si a matou ekalesia. O le Afioga ia Iliganoa Naiana Kaisala o se tinā sa fiafia e tautua ma sa fai ma ana mea suamalie le ola Faa-auauna. Sa faamanuiaina e le Atua i taleni e tele, e fesoasoani i ona faiva

ILIGANO A N. **KAISALA**

alofilima faatinā. Amuia lava lea auauna auā e valaau mai le Matai ae oloo faapea ona fai. Sa auau lava foi manatu o lona toe sauniga i upu a le Poto e faapea *"¹E sili ona lelei o le tauleleia i le suauu lelei; ma le aso e oti ai e sili i le aso e fanau mai ai."* (Failauga 7).

Sa taitai e Siaosi Salesulu FS ona toe sauniga. O molimau a le fanau sa saunia e le Afioga i le tiakono ia Sililauga Taitoe Kaisala ma le molimau a le ekalesia sa saunia e Siaosi Salesulu (FS) Sa faai i lona oliolisaga tumau i lona maota i Vailele. Oupu a le tatou Alii Faaola *"¹Aua le atuatuvaile ō outou loto: ia outou faatuatua i le Atua, ia faatuatua mai foi iā te A'u. ²E tele mea e nonofo ai i le maota o Lo'u Tamā"* (Ioa.14)

E viia pea le Atua soifua i lana pule faa-soifua - le Atua o le ola, Lē soifua e faavavau, ma Lē ua avea ma o tatou fesoasoani i taimi uma o le puapuaga, e le finagalo o Ia e faatiga pe faapuapuagatia le fanau a tagata. O Ia o le Atua e faamafanafana i e faanoanoa, ma foai mai i ai Lona alofa tunoa.

Ia manuia lau malaga Iliganoa Naiana Kaisala.

Susuga Siaosi Salesulu FS,
EFKS Vailele, APIA SASA'E

O E UA FAI I LAGI FOLAUGA



SEUMANUTAFASUAO FITIAO
VAITOGI TALIFEAU MALAKI IAKOPO
(A'OA'O FESOASOANI)



ILIGANOA NAIANA
KAISALA



LOTOLUA VAIGALU
NIUMATA PELE



TAUMALATOU I.F.E.
MAUGA TAANO
FESAGAIGA